

20. ALDIZKARIA - 2017ko urtarrilaren 30a

15. ORDENANTZA FISKALA, ETXeko LAGUNTZA ZERBITZUA EMATEKO PREZIO PUBLIKOAK ARAUTZEN DITUENA

OINARRIA

1. artikulua. Nafarroako Toki Ogasunei buruzko martxoaren 10eko 2/1995 Foru Legearen 28. artikuluan eta hurrengoetan xedatutakoaren babesean ezarri da ordenantza honetako prezio publikoa.

ZERGAPEKO EGINTZA

2. artikulua. Zergapeko egintza da etxeko laguntza zerbitzua zuzenean ematea, Barañaingo Udalak arlo honi buruz onetsi duen ordenantza ez fiskalean ezarritako baldintzetan.

SUBJEKTU PASIBOA

3. artikulua. Subjektu pasiboak izanen dira 2. artikuluan azaldutako zerbitzuak eskatu eta erabiltzen dituzten pertsonak.

PREZIO PUBLIKOA. TARIFEN SISTEMA

4. artikulua. Finantzabideari aplikatzen ahal zaizkion irizpide eta printzipioak ondokoak dira:

–Familia unitatearen definizioa: prezio publikoa kalkulatzeko erabiliko da PFEZan definitzen den familia unitatea:

- Legez bereizirik ez dauden ezkontideek eta adingabeko seme-alabek osatua (gurasoen baimena izanda beraiekin bizi ez direnak salbu); unitate horretan sartzen dira, halaber, judizialki ezgaituta eta guraso-aginte luzatu edo birgaituaren menpe dauden adin nagusiko seme-alabak.
- Berariazko legeen arabeko bikote iraunkor bateko kideek eta adingabeko seme-alabek osatua (gurasoen baimena izanda beraiekin bizi ez direnak salbu); unitate horretan sartzen dira, halaber, judizialki ezgaituta eta guraso-ahal luzatu edo birgaituaren menpe dauden adin nagusiko seme-alabak.
- Legezko banantzearen kasuetan edo, ezkontzaren bidezko loturarik edo bikote iraunkorrik ez dagoenean, aitak edo amak eta batarekin edo bertzearekin bizi diren seme-alaba guztiak osatzen dutena, aitzineko atalean aipatu betebeharrak betetzen badituzte.

–Ahalmen ekonomikoa zehaztea: errenta eta gastu kengarriak:

- Errenta: PFEZaren etekin garbiak eta pentsio edo prestazio salbuetsiak.
- Gastu kengarriak: kuotan desgrabazioa izateko oinarria eratzen dutenak, ondoko arrazoiak direla eta: pertsonalak, etxebizitza alokairuan hartu edo erostea, eta menpekotasunagatik emandako laguntzaren ingurukoak (eguneko zentroak, garraioa, etxeko lanak eta bertzelakoak).
- Hileko per capita errenta: aurreko kontzeptuak batu eta familia unitatea osatzen duten kideen kopuruaz eta 12 hilabetez zatituta sortzen dena.

Erabiltzailea PFEZaren aitortpena egitera behartua ez dagoenean, aurreko ekitaldian izandako diru-sarreraren arabera zehaztuko da ahalmen ekonomikoa.

–Janariaren kostuaren oinarritzko unitatea zehaztea:

Janariaren kostua izanen da enpresa esleipen hartzaileak Barañaingo Udalarari janari bakoitzeko fakturatzen dion kostu egiazkoa (BEZa barne).

–Gainerako zerbitzuen kostuaren oinarritzko unitatea zehaztea:

Zerbitzuaren kostu guztiak egotzi eta emandako laguntzaren guztirako kostuaren balioa, ordu bakoitzeko, zenbat den ateratzeko, honela egingen da:

Urtero zehaztuko da kostu zentro bat, eta horri egotziko zaizkio zerbitzuaren zuzeneko eta zeharkako kostu guztiak: lanaldi osoko familia-langile baten kostua eta gizarte-langilearen eta administrari laguntzailearen kostuaren %15, azken bi profesional horiek ere zuzenean parte hartzen baitute zerbitzuaren kudeaketan.

Guztirako kostua lanaldi osoko familia-langile batek etxeko laguntzarako egiten ahal dituen orduen kopuruaz (lanaldi horren %80) zatituta ateratzen da laguntza orduaren kostua.

–Janariaren tarifaren oinarritzko unitatea zehaztea:

Tarifaren oinarritzko unitatea da janaria erabiltzailearen etxera eramatearen kostu egiazkoa.

Prezio publikoa edo tarifa izanen da laguntza orduaren %100.

–Gainerako zerbitzuen tarifaren oinarritzko unitatea zehaztea:

Zerbitzua etxean ematen iragandako denbora da tarifaren oinarritzko unitatea.

Laguntza orduaren %50 izanen da prezio publikoa edo tarifa.

–Prezio publikoa kargatzeko gero eta gehiagorako eskala:

Karga-eskala familia unitatearen per capita errenta garbiari egotziko zaio, eta errenta horrek urteko OAEAParekiko (ondorio askotarako errentaren adierazle publikoa) gordetzen duen proportzioan oinarrituko da.

Aplikatu beharreko tarifak ordenantza honen eranskinean agertzen dira.

PREZIO PUBLIKOEN SORTZAPENA

5. artikulua. Tasak hilabete natural osoak bukatutakoan sortuko dira, subjektu pasiboa zerbitzua erabiltzetik gelditzen ez den bitartean. Hasierako edo azkeneko aldiak ez badatoz hilabete naturalekin bat, egun naturalen arabera hainbanaketa egingen da.

6. artikulua. Aski ongi justifikatu eta baloraturiko inguruabar jakin eta bereziak direla bide, ikusten bada erabiltzaile batendako baremoa aplikatuzetik etortzen den tasa ordaintzea gehiegizko zama dela, zerbitzuko gizarte langileak proposatzen ahal du erabiltzailea diru-sarrera apalagokoen mailan sartzea edo tasa ordaintzetik salbuestea.

7. artikulua. Prezio publikoa hilero ordainduko da, zerbitzuaren sorrarazpena izan eta hurrengo hilabeteko lehenbiziko bost eguneko epearen barnean eta horretarako ezartzen den moduan.

ARAU-HAUSTEAK ETA ZEHAPENAK

8. artikulua. Arau-haustetzat hartuko da, tarifa tikiagoa izateko asmoz aurkezten diren agiri edo aitopenak faltsutzea, baita Udalari ez jakinaraztea ere tarifen kalkulua egiteko kontuan hartu behar diren diru-sarrerak handitu direla.

9. artikulua. Egiten diren arau-hausteak Toki Ogasunei buruzko 2/1995 Foru Legean ezarritakoaren arabera zehatuko dira, eta erabiltzailea zerbitzutik kentzeraino heltzen ahalko da.

AZKEN XEDAPENAK

Lehenbizikoa.–Ordenantza honetan aurreikusten ez den orotan, Toki Administrazioari buruzko Foru Legean eta Nafarroako Toki Ogasunei buruzko martxoaren 10eko 2/1995 Foru Legean xedatuari jarraituko zaio.

Bigarrena.–Ordenantza fiskal honek Nafarroako Toki Administrazioari buruzko uztailaren 2ko 6/1990 Foru Legean aurreikusitako tramiteak bete ondoan hartuko du indarra.

2017KO TARIFEN ERANSKINA

I. epigrafean.–Zuzeneko prestazioak.

ERRENTA MAILAREN TARTEAK	TARIFAREN ESKALA
PCEG (per capita errenta garbia) < OAEAP	3 euroko tarifa finkoa, hilean
OAEAP < PCEG > %105 OAEAP	6 euroko tarifa finkoa, hilean
%105 OAEAP < PCEG > %120 OAEAP	Prezio publikoaren %15
%120 OAEAP < PCEG > %135 OAEAP	Prezio publikoaren %30
%135 OAEAP < PCEG > %150 OAEAP	Prezio publikoaren %45
%150 OAEAP < PCEG > %165 OAEAP	Prezio publikoaren %60
%165 OAEAP < PCEG > %180 OAEAP	Prezio publikoaren %75
%180 OAEAP < PCEG > %195 AEAP	Prezio publikoaren %90
PCEG > %195 OAEAP	Prezio publikoa

II. epigrafean.–Otordu zerbitzua.

ERRENTA MAILAREN TARTEAK	TARIFAREN ESKALA
PCEG (per capita errenta garbia) < = OAEAP	Prezio publikoaren %20
OAEAP < PCEG < = %105 OAEAP	Prezio publikoaren %40
%105 OAEAP < PCEG < = %120 OAEAP	Prezio publikoaren %60
%120 OAEAP < PCEG < = %135 OAEAP	Prezio publikoaren %80
%135 OAEAP < PCEG < = %150 OAEAP	Prezio publikoaren %100
%150 OAEAP < PCEG < = %165 OAEAP	Prezio publikoaren %110
%165 OAEAP < PCEG < = %180 OAEAP	Prezio publikoaren %120
%180 OAEAP < PCEG < = %195 AEAP	Prezio publikoaren %130
PCEG > %195 OAEAP	Prezio publikoaren %140